

DECLARATION

DV ROY, SVR L'ARREST
fait de la personne de Monseigneur
le Prince de Condé, & sur l'eslongne-
ment des autres Princes, Seigneurs &
Gentils-hommes.

*Publiée en Parlement le Roy y seant le septiesme
iour de Septembre 1616.*



A PARIS,

Chez FED. MOREL, & P. METTAYER,
Imprimeurs ordinaires du Roy.

M. DC. XVI.

Avec Privilege de sa Majesté.

LOVIS PAR LA GRACE
DE DIEV, ROY DE
FRANCE ET DE NA-
VARRE, A tous ceux qui
ces presentes lettres verront, Salut. C'est
avec vn regret incroyable & qui nous
perce le cœur, qu'il faille que si souuent
nous employons nostre auctorité, pour
reprimer les mal'heureux desseins de
ceux qui cherchent en la ruine de nostre
Estat l'aduancement de leur fortune, &
dans les prodigieuses cruantez des guer-
res ciuiles, la licéce de tout ce que les loix
& la raison leur defend: Et encores plus
quand il faut que les necessaires remedes
que nous apportons à la seureté de no-
stre personne & salut de cet Estat, diffam-
ment & des-honnorent nostre propre
sang, & le rendent coupable d'impieté,
tant enuers nous qui tenons lieu de pere
enuers tous nos subjets, qu'enuers leur
cõmune patrie, qui est reuecee comme

mere par les peuples les plus barbares.
 C'est neantmoins ce qui nous arriue au-
 iourd'huy, quand nous mettons au iour
 les iustes plaintes que nous faisons tant
 contre nostre Cousin le Prince de Con-
 dé, que contre les Princes, Seigneurs, &
 autres qui adherent aux mauuais & per-
 nicieux desseins qui ont esté ourdis con-
 tre nostre personne & nostre Estat: estât
 impossible que ceux qui considereront
 d'vn costé nostre demesuree clemence,
 tant de fois employee à les gaigner &
 acquerir, & d'autre leur indomptable
 opiniaistreté à nous offenser, voire ruy-
 ner, ne detestent avec horreur vne si in-
 grate mecognoissance. Lors que dernie-
 rement ils s'esleuerét en armes, sous pre-
 texte d'empescher la plus honorable al-
 liance que nous pouuions prendre en
 toute la Chrestienté, & pour reformer
 nostre Estat par son entiere ruine, Nous
 pouuions aisément avec vn peu de pa-
 tience les voir fondre & se consumer

de foy-mesmes pour retôber à nos pieds & estre reduits à nostre misericorde. mais iettans les yeux sur les miseres & calamitez qu'ils faisoient souffrir à nos peuples, Nous auons voulu comme pere pitoyable payer la rançon de nos pauures subjets par la diminution de nostre auctorité, par l'extreme incommodité de nos affaires, & euident dommage de nostre Estat. C'est pourquoy par le Traicté de Lodun nous accordasmes à nostredit Cousin tout ce qu'il nous demâda; Nous ne luy laissames pas seulement le Gouuernement de Berry, mais nous recompensames chèrement toutes les places fortes qui y sont, & tout le Domaine pour le luy bailler, & accordasmes ou pour gratification, ou pour licenciemēt de ses troupes, des sommes si immēses que les despenses de ceste guerre, ou du Traicté, nous reuiennent à plus de vingt millions. Pour contenter nostre Cousin le Duc de Longueuille nous auons tiré

s

de la Picardie & de la Citadelle d'Amiès
ceux qui y commandoient, pour y met-
tre personne qui luy peust estre aggre-
able: & pour luy donner plus de sujet de
se rapprocher de nous, faict esloigner
ceux que nous croyons qui luy estoient
des-agreables. Nous auons donné à no-
stredit Cousin le Prince de Condé, lors
qu'il est venu vers nous telle part qu'il a
desiré au maniement de l'Estat, & parti-
culieremēt la direction de nos finances,
bien que ce fut chose qui semblast alie-
ne de sa qualité, & que chacun iugeoit
preiudiciable à l'Estat. Toutefois les ex-
ceds de nos graces & faueurs n'ont peu
retenir les volonteze desordonnees de
ceux qui ne trouuent leur repos que dās
les troubles de nostre Estat, & ne mettēt
leur esperance qu'en nostre ruine. Car &
deuant & depuis l'arriuee de nostredit
Cousin, ont esté tenües plusieurs assem-
blees nocturnes en nostre ville de Paris,
mesmes à S. Martin Deschamps, & aux

16
faux-bourgs S. Germain, où se sont trou-
uez des Princes & autres des plus grands
qui fussent pres de nous : & mesmes au-
cuns de nos Officiers, dōt les vns se sont
depuis retirez, aduoïans leur crime par
leur fuite. A la suite de cela, ont esté fai-
ctes pratiques & menees pour desbau-
cher le peuple, & l'esmouuoir à sedition,
& pour gagner ceux qui auoient char-
ge des armes en ceste nostre bonne vil-
le, comme Colonels & Capitaines, &
ce sur diuers pretextes : à quoy ont esté
mesmes employez plusieurs de nosdits
Officiers. Lon n'a point aussi oublié de
practiquer les Curez & Predicateurs,
aufquels on a faiçt tenir des langages
scandaleux, non plus que les Seigneurs
& Gentils-hommes qui estoient au-
tour de nous, & cela si ouuertement
que ceux qui faisoient telles menees,
n'ont point eu crainte de faire dire à la
Royne nostre tres-honoree Dame &
mere, qu'ils estoient tellement liez, que

rien ne les pouuoit separer, leurs seru-
 teurs & suiuaus difans publiquemēt que
 nul que Dieu ne les pouuoit empescher
 de changer le gouvernement. En suite
 de cela seroit arriué le saisissement & oc-
 cupation de la ville & Chasteau de Pe-
 ronne, dont les Cōseils ont esté tramez
 près de nostre personne: dequoy bien
 que nous eussions iuste occasion d'estre
 grandement indignez, & avec la force
 venger l'iniure qui estoit faicte à nostre
 auctórité: neantmoins nous nous seriōs
 accōmodez à toutes les propositiōs qui
 nous auroiēt esté faictes pour composer
 doucement cēt affaire. Mais au lieu de
 faire profit de nostre bonté & indulgen-
 ce, il seroit entré dedans quatre compa-
 gnies de gens de pied, tambour battant,
 parties des places commandees par ceux
 qui estoient près de nous & qui trempoiēt
 à tous ces desseins. Ce qui auroit telle-
 ment dépleu à tous ceux à qui il restoit
 encores quelque respect de nostre au-

thorité, qu'une Princesse qui attrouche de fort prez ceux qui estoient interessez en ce faict là ; touchée de la compassion de nostre fortune, auroit donné auis à la Royne nostredite tres-honoree Dame & mere, des desseins des entrepreneurs : & nous auroit faict aduertir de prendre garde à nous, d'autant que leurs conseils tendoient à se saisir de nostre personne, & de la Royne nostredite Dame & mere, & se cantonner par toutes les Prouinces de nostre Royaume: d'ot toutesfois l'horreur auroit esté si grad en l'ame de ceux qui y auoient trépé, que mesmes nostredit Cousin auant sa detention, auroit ingenuëment confessé à nostredite Dame & mere, s'estre trouué audit conseil: Et qu'à la verité nous auions occasion d'auoir soubçon de luy, adioustant toutesfois que nous & nostredite Dame & mere, luy estions obligez autant qu'à nos propres peres. Lesquelles mesmes paroles auroient esté aussi dites à ladite Dame
par

par vn autre Prince, la pria de n'ē point faire de semblant, de peur que nostredit Cousin ne se retirast. Et de faict nous auions deliberé, en dissimulant, laisser les autheurs de telles brouilleries par nostre patience, & les ramener à leur deuoir: mais nous fusmes incontinent aduertis de toutes parts, que nonobstāt la Declaration de nostredit Cousin, il ne laissoit pas avec ses adherās, de persister en leurs mauuais desseins: De sorte qu'vn des grāds de nostre Royaume vint vers nostredite Dame & mere, luy reueler qu'il auoit esté en l'vn desdits conseils, où il se traittoit de se saisir de nostre personne, & s'ēparer du Gouvernement de l'Estat. Et en mesme temps vn autre de semblable qualité, auroit enuoyé à nostredite Dame & mere, vn Conseiller de nostre Parlement, pour nous donner aduis desdites entreprises. Et depuis encores seroit venu luy mesmes, & nous auroit coniuuré de pouruoir à la seureté de nos persōnes,

protestant qu'il le disoit pour la descharge de sa conscience : adioustant que l'armee qui estoit à Peronne eust esté mieux auprès de nous, & qu'il eust desiré que nous eussions esté hors d'icy au milieu de douze cens cheuaux. Vn des principaux Prelats de ce Royaume, & qui estoit entierement hors de soupçon de vouloir rien feindre en ceste occasion, nous vint aussi aduertir qu'on proposoit parmy les auteurs de ces desseins, d'aller à nostre Parlement reprédre les erres de l'Arrest, par lequel on auoit ordonné que les Princes, Pairs de France, & Officiers de la Couronne, seroient conuoquez pour pouruoir au Gouvernemēt, & là proposer de nous l'oster. Et ces choses estoient desja si publiques, que les Ambassadeurs des Princes estrangiers qui estoiet en nostre Cour, nous donoient aduis par escrit de leurs mains, & sollicitoient officieusement de prendre garde à nous. On nous rapportoit aussi qu'és festins qui se fai-

soient parmy ceux qui suiuoient nostredit Cousin, c'estoit vn terme d'allegresse ordinaire Barre à bas, pour dessigner sa pretention à la Couronne. En mesme temps nous scauions que de tous costez on leuoit des forces en nostre Royaume, sans nostre permission, & sur les cōmissions de ceux qui estoient près de nous, & en faison qu'on ne pouuoit prendre pretexte que ce fust pour s'en seruir ailleurs. Cela avec telle licence que le iour auant que nous ayons faict arrester nostredit Cousin, il fut tiré de ceste ville de Paris des armes pour armer trois mil hommes. Nostre patience en fin vaincuë par l'euidence du peril, qui ne regardoit pas seulement nostre personne, mais traينوit apres soy l'entiere ruine de nostre Royaume, qui nous est plus cher beaucoup que nostre vie, nous nous sommes retournez vers Dieu, & apres auoir, comme en chose desesperée imploré son assistance & conseil, nous auõs trouué n'y

auoir plus autre remede à ce mal, que de
 nous asseurer de la persõne de nostredit
 Cousin, bien que nous cognussions assez
 le hazard que nous courions par les me-
 nees & pratiques, avec lesquelles on a-
 toit de long temps aliené les cœurs &
 volonteze non seulement de nos subjets,
 mais de nos propres Officiers & serui-
 teurs. Nous l'auõs docques faict arrester,
 & loger près de nous en nostre Chasteau
 du Louure, avec le plus honorable & fa-
 uorable traitement que telle occasion
 pouuoit souffrir. Et pour ce que par ce
 que dessus nostredit Cousin, & ceux qui
 luy ont adheré, ont manifestemēt violé
 la foy qu'ils nous auoiēt donnee, & con-
 treuenü en toutes façons audit Traicté
 de Loudun, comme ils auoient faict à
 celui de Sainte-Menchoud par l'entre-
 prise de Poictiers, comme il est verifié
 par l'information de plus de cent cin-
 quante tesmoins dignes de foy : nous ne
 doudtons point que selon que les esprits

sont miserablement partialisez & pre-
 uenus de diuerses passions, beaucoup
 de gens mal affectionnez à nostre serui-
 ce, & au bien de nostre Estat, ne veüil-
 lent donner des sinistres interpretations
 à cet euenement : Nous auons voulu
 par ces presentes esclaircir vn chacun de
 nostre intention, & pouruoir quant &
 quant à ce qui est de la seureté de nostre
 Estat & bien de nos subjets; & leur faire
 cognoistre que nostre bonté & clemen-
 ce ne peut estre veincue par leur obsti-
 nation. Et pour cet effect, SÇAVOIR
 FAISONS, Qu'apres auoir mis cet af-
 faire en deliberation en nostre Conseil,
 où estoient la Royne nostredite Dame
 & mere, aucuns Princes, Officiers de no-
 stre Couronne, & autres principaux Sei-
 gneurs de nostredit Conseil, & de l'ad-
 uis d'iceluy, Nous auons déclaré & de-
 clarons par ces presentes signees de no-
 stre main, que par la detention & arrest
 faict de la personne de nostredit Cou-

fin, nous n'auons entendu ny entédons
 en façon quelconque contreuenir à no-
 stredit Traicté de Lodun, ny priuer au-
 cun de nos subjets demeurant en nostre
 obeissance, du fruiet & benefice d'ice-
 luy, lequel nous voulons estre inuiola-
 blement gardé, pour le regard de tous
 nos subjets qui sont demeurés en leur de-
 uoir & en nostredite obeissâce. Et pour
 d'abōdant exercer enuers eux nostre cle-
 mence, Voulons & nous plaist, que tous
 ceux qui ont adheré à nostredit Cousin,
 & aux desseins & conseils qui ont esté
 pris & tenus contre nostre Estat, reue-
 nans à nous dans quinzaine apres la pu-
 blication des presentes en nos Parle-
 mens, & nous en demandans pardon,
 n'en soient en façō quelconque recher-
 chez:abolissant en ce cas tout ce dont ils
 pourroiet estre coupables: promettant
 les reprendre en nostre grace. Comme
 aussi en cas qu'ils perseuerent en leur
 faute, les auons déclaré & declarons cri-

minels de leze Majesté: voulõs estre procedé contre eux suiuant la rigueur des loix, & de nos Edicts & Ordonnances.

SI DONNONS en mandement à noz amez & feaux Conseillers les gens tenans nos Cours de Parlement, Baillifs, Seneschaux ou leurs Lieutenans, & à tous autres nos Iusticiers & Officiers qu'il appartiendra, chacun endroit soy, que ces presentes ils verifient & facent enregistrer, publier, garder & obseruer selon leur forme & teneur: & à nos Procureurs Generaux desdites Cours, faire toutes poursuites & diligences pour l'execution d'icelles. Car tel est nostre plaisir. En tesmoin dequoy nous auons fait mettre nostre seel à cesdites presentes.

DONNEES à Paris, le sixiesme iour de Septembre, l'an de grace mil six cens seize, & de nostre regne le septiesme.

Signé, LOVIS. Et plus bas,

Par le Roy, DE LOMENIE.

Et scellees du grand seel de cire iaune en double queuë,

Leuës, publiees & registrees, ouy
& ce requerant le Procureur Gene-
ral du Roy, & ordonne que coppies
collationnees seront enuoyees aux
Bailliages & Seneschauſſees pour y
estre semblablement leuës, publiees,
registrees, gardees & obseruees selon
leur forme & teneur. A Paris en
Parlement le Roy y seant, le septies-
me Septembre mil six cens seize.

Signé,

DV TILLET.